

# Lupus 3 bot nelayan Vietnam jadi tukun tiruan

Zatul Iffah Zolkipli | Disiarkan pada: April 1, 2021 @ 4:57pm

zatuliffah@hmetro.com.my



KERJA-KERJA menenggelamkan bot nelayan Vietnam yang dilucut hak untuk dijadikan tukun berhampiran perairan Gong Balai, Merchang, Marang. FOTO Ihsan APMM

Kuala Terengganu: Agensi Penguatkuasaan Maritim Malaysia (APMM) menenggelamkan tiga bot nelayan Vietnam pada jarak 3.6 batu nautika di perairan Gong Balai, Merchang, Marang untuk dijadikan tukun tiruan, hari ini.

Pengarahnya Kepten Maritim Muhammad Suffi Mohd Ramli berkata, ia adalah bot nelayan Vietnam yang ditahan serta dilucut hak oleh mahkamah sepanjang tahun lalu kerana mencero boh dan menangkap ikan di perairan negara.

Katanya, kesemua bot itu ditahan Kapal Maritim (KM) Gemia dalam Op Kuda Laut yang dilaksanakan sepanjang tahun lalu.

"Ini adalah pelupusan ketujuh untuk tahun ini dan sebanyak 40 bot lagi akan ditenggelamkan selepas mendapat pelucutan hak daripada mahkamah.

"Sehingga kini, APMM sudah menenggelamkan sebanyak 102 bot sebagai tukun tiruan di sepanjang perairan Terengganu," katanya dalam satu kenyataan di sini hari ini.

Katanya, kaedah menenggelamkan bot sebagai tukun tiruan adalah satu inisiatif dalam memulihara dan menggalakkan biodiversiti marin serta simbolik kepada keseriusan APMM dalam mengekang kemasukan nelayan asing ke perairan negara secara haram.

"Pelupusan bot ini turut mendapat kerjasama Jabatan Perikanan Malaysia, Jabatan Laut Malaysia, Persatuan Nelayan Kuala Terengganu Utara serta Institut Sumber Marin Asia Tenggara (ISMAT).

"Kita akan terus melaksanakan rondaan untuk mengesan kegiatan pencerobohan nelayan asing dan aktiviti-aktiviti yang melanggar undang-undang di sekitar perairan Terengganu," katanya.

Artikel penuh: <https://www.hmetro.com.my/mutakhir/2021/04/690342/lupus-3-bot-nelayan-vietnam-jadi-tukun-tiruan>